


Ettiquettes of Life

Standard: **Najm**



IRC ARABIC ACADEMY

READ | UNDERSTAND | PRACTICE

Etiquettes of Life

Standard: **Najm**



IRC ARABIC ACADEMY

READ | UNDERSTAND | PRACTICE

Title : Etiquettes Of Life

Class : Shams

Edition : 1st Edition (2022-23)

Pages : 47

Author & Published By : IRC Arabic Academy

Note: If you find any correction in this book, Please Inform us, Mobile No: 80-5506-5506

Index

Topics	Page No.
1 Allah Ka Adab	2
2 Rasoolullah Ka Adab	4
3 Quran Ke Aadaab	6
4 Salam Ke Aadaab	9
5 Ustaad Ka Adab	12
6 Classroom Ke Aadaab	15
7 Classmates Ke Saath Rehne Ke Aadaab	18
8 Musalmaan Ke Aadaab	22
9 Waledain Ke Aadaab	23
10 Ghar Me Aane Jaane Ke Aadaab	27
11 Baitul Khala (Toilet) Ke Aadaab	30
12 Sone Ke Aadaab	32
13 Neend Se Bedaar Hone Ke Aadaab	35
14 Khwaab – Dreams Kya Hai	37
15 Khane Ke Aadaab	40
16 Cheenk Aur Jamai Ke Aadaab	44

1 Allah Ka Adab



1. Allah Par Imaan Lana Ke Allah Ek Hai Aur Wahi Haqeeqi Mabood Hai Aur Uske Siwa Koi Ibadat Ke Layaq Nahi.
(Surah Baqarah 2:163)
2. Allah Ki Ita'at Aur Farmabardari Karna.
(Surah Al Maidah 5:92)
3. Har Qism Ki Ibadat Sirf Allah Ta'ala Ke Liye Karna.
(Surah Taha 20:14)
4. Tawheed e Ruboobiyat, Tawheed Uloohiyat Aur Tawheed e Asma Wa Sifat Ka Khayaal Rakhna.
5. Allah Ki Hudood Ka Khayal Rakhna. Allah Ki Haram Karda Cheezo Ko Haram Samajhna Aur Halal Karda Cheezo Ko Halal Samajhna.
(Surah Al Maidah 5:87)
6. Shairullah شَعَائِرُ اللَّهِ (Allah Ki Nishaniya, Sacred Things) Ka Ahteram Karna.
(Surah Baqarah 2:229)
7. Har Kaam (Amal) Sirf Allah Ki Razaa Ke Liye Karna.
(Surah An Nisa 4:114)
8. Khule Aur Chupe Me Allah Ka Dar (Taqwa) Rakhna.
(Surah Al Muminun 23:52)

9. Allah Aur Uske Rasool Ke Ahkaam Ke Aage Na Barhna.
(Surah Al Hujarat 49:1)
10. Allah Se Tauba Aur Astaghfar Karna. (Surah An Nisa 4:17)
11. Allah Ka Kasrat Se Zikr Karna. (Surah Al Ahzab 33:41)
12. Allah Ke Kalam Quran Ki Tilawat Karna.
(Surah Al Ankabut 29:45)
13. Har Haal Me Allah Ka Shukr Ada Karte Rehna.
(Surah Luqman 31:12)
14. Allah Ta'ala Har Cheez Ko Janta Hai Jo Hum Chupate Hai. Aur Jo Hum Zahir Karte Hai. (Surah Al nbiya 21:110)
15. Allah Par Bharosa Aur Tawakkul Rakhna.
(Surah Az Zumar 39:38)
16. Allah Ki Rahmat Se Kabhi Mayus Na Hona.
(Surah Yusuf 12:87)
17. Mohabbat, Khauf Aur Ummid Sirf Allah Se Ho.
(Surah Al A'raf 7:56)
18. Kisi Takleef Ke Pahonchne Par Allah Se Shikwa Na Karna.
19. Har Takleef Par Sabr Aur Nemat Par Shukar Ada Karna.
20. Dua Sirf Allah Se Karna. (Surah Maryam 19:48)
21. Allah Ke Deen Ki Dawat Dena Aur Achi Baato Ka Hukm Dena Aur Buri Bato Se Rukna. (Surah Aal Imran 3:114)

2

Rasoolullah ﷺ Ka Adab

1. Rasoolullah ﷺ Par Imaan Lana.
(Surah An Nisa 4:136)
2. Rasoolullah ﷺ Ki Itteba Karna.
(Surah Aal Imran 3:53)
3. Rasoolullah ﷺ Ki Zaat Me Hamare Liye
Behtareen Namoonah (Ideal) Hai.
(Surah Al Ahzab 33:21)
4. Rasoolullah ﷺ Se Mohabbat Aur Unki Farmabardari
Lazim Aur Farz Hai. (Surah An Nisa 4:13)
5. Rasoolullah ﷺ Ka Difa Karna.
(Sunan Abu Dawud Hadith No. 5015)
6. Rasoolullah ﷺ Se Mohabbat Apne Waledain, Aulaad Aur
Tamam Cheezo Se Zyada Honi Chahiye.
(Sahih Muslim Hadith No. 169)
7. Rasoolullah ﷺ Ke Deen Ki Madad Karna.
(Surah Muhammad 47:7)
8. Rasoolullah ﷺ Ka Adab Karna. (Surah Al Fath 48:9)
9. Rasoolullah ﷺ Par Durood Bhejna. (Surah Al Ahzab 33:56)
10. Rasoolullah ﷺ Ke Dosto Se Dosti Aur Dushmano Se
Dushmani Rakhna.
11. Rasoolullah ﷺ Ke Ahle Bait Aur Sahaba Se Mohabbat
Karna.
12. Rasoolullah ﷺ Se Jafa (Disloyal) Na Karna.
13. Rasoolullah ﷺ Ke Aage Apni Awaz Ko Buland Na
Karna Yaani Jab Rasoolullah ﷺ Ki Koi Sahi Hadees

Aajaye To Uske Mukhalif Kisi Ki Ya Khud Ki Raaye Ko Tarjeeh Na Dena. (Surah Al Hujurat 49:2)

14. Rasoolullah ﷺ Ne Jin Cheezo Ka Hukm Diya Uspar Amal Karna Aur Jin Cheezo Se Rukne Ka Hukm Diya Us Se Ruk Jana. (Surah Al Hashr 59:7)
15. Rasoolullah ﷺ Ki Har Baat Ki Tasdeeque Karna Aur Us Par Poora Imaan Lana. (Surah Al Hujurat 49:15)



1. Quran Allah Ka Kalaam Hai. Jo Mohammed ﷺ Par Nazil Hua.
(Surah Ash Shu'ra 26:192-196)
2. Quran Par Amal Karne Wale Allah Ke Qareebi Bande Hote Hai.
3. Quran Humare Liye Hidayat Ki Kitab Hai Aur Hum Musalmaano Ko Quran Ke Mutabiq Apni Zindagi Guzarna Hai.



❖ Quran Ki Fazeelat:

إِقْرُوا الْقُرْآنَ فَإِنَّهُ يَأْتِي يَوْمَ الْقِيَامَةِ شَفِيعًا لِأَصْحَابِهِ

“Quran Parho Ye Roze Qayamat Amal Karne Wale Ke Liye Sifarishi Ban Kar Aayega”.

(Sahih Muslim Hadith No. 1874)

خَيْرُكُمْ مَنْ تَعَلَّمَ الْقُرْآنَ وَعَلَّمَهُ

“Tum Me Behter Woh Hai Jo Quran Seekhe Aur Sikhaye”.

(Sahih Al Bukhari Hadith No. 5027)

❖ Tilawat Ka Ajr:

Rasoolullah ﷺ Ne Farmaya; “Jisne Allah Ki Kitab Me Se Ek Harf Parha Use Iske Badle Ek Neki Milegi Aur Ek Neki Ka Ajr Dus (10) Guna Hai, Main Nahi Kehta Ke اَلَمْ Ek Harf Hai, Balke Alif Ek Harf Hai Laam Ek Harf Hai Aur Meem Ek Harf Hai.

(Sunan Tirmidhi Hadith No. 2910)

❖ Aadaab e Tilawat:

1. Behtareen Halat Me Tilawat Kare Yani Ba Wudhu Aur Qibla Rukh Ho Kar Aur Adab Ke Sath Baith Kar.
2. Tilawat Me Jaldi Na Kare, Thahar Thahar Kar Parhe.

(Surah Al-Muzzammil 73 : 04)

Rasoolullah ﷺ Ka Farman Hai, “Jo Ise (Quran Ko) Teen (3) Raat Se Kam Me Pura Parhta Hai Isne Ise Nahi Samjha”. (Sunan Abu Dawud Hadith No. 1390)

3. Khushu Wa Khuzu Se Tilawat Kare.
4. Achchi Aawaz Ke Saath Quran Ko Parhe.

زَيِّنُوا الْقُرْآنَ بِأَصْوَاتِكُمْ

"Apni Awaz Ke Sath Quran Ko Muzayyan Karo".

(Sunan Nasai Hadith No. 1017)

5. Dikhawe Aur Kisi Ko Sunane Ke Jazbe Ki Khwahish Paida Hone, Ya Kisi Namazi Ki Namaz Me Khalal Hone Ka Dar Ho To Tilawat Ahista Kare.

6. Quran Ke Meaning Aur Mafhoom Par Ghaur Wa Tadabbur Ke Sath Tilawat Kare.
7. Tilawat Ke Waqt Ghaflat Karne Se Bache.

❖ Quran Ke Huqooq:

Har Musalmaan Par Quran Ke 5 Huqooq Hai;

1. Us Par Imaan Laye. (Surah Baqarah 2:285)
2. Uski Tilawat Ki Jaye. (Surah Kahf 18:27)
3. Use Samjha Jaye. (Surah An Nahl 16:44)
4. Us Par Amal Kare.
5. Uski Taalimaat Dusron Tak Pohchaye.
(Sunan Tirmidhi Hadith No. 2669)

4 Salam Ke Aadaab

1. Jab Hum Aapas Me Mile To Hum Ek Doosre Ko Greet Kare, Jiske Liye Rasoolullah ﷺ Ne Hame Kuch Kalimaat Sikhaye Hai.



❖ Salaam Karne Ke Kalimaat:

السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ

Assalaamu Alaykum Wa Rahmatullahi Wa Barakatuhu

❖ Salaam Ka Jawab Dene Ke Kalimaat:

وَعَلَيْكُمْ السَّلَامُ وَرَحْمَةُ اللَّهِ وَبَرَكَاتُهُ

Wa Alaykum Assalaam Wa Rahmatullahi Wa Barakatuhu

2. Rasoolullah ﷺ Ne Salaam Ko Phailane Ka Hukm Diya Hai:

أَفْشُوا السَّلَامَ بَيْنَكُمْ

“Rasoolullah ﷺ Ne Farmaya,” Kya Main Tumhe Aisi Cheez Na Bataun Ke Jab Tum Ise Ikhtiyar Karoge To Aapas Me Mohabbat Karne Lagoge, Tum Aapas Me Salaam Ko Aam Karo”. (Sahih Muslim Hadith No. 194)

3. Rasoolullah ﷺ Ne Farmaya,

السَّلَامُ قَبْلَ الْكَلَامِ

“Baat Cheet Karne Se Pahle Salam Kiya Karo”

(Sunan Tirmidhi Hadith No. 2699)

4. **Salaam Me Jo Pahel Karega (Salaam Karne Me Jaldi Karega) Use Ajr-o-Sawab Zyada Milega.**

5. **Salaam Me Pahel Woh Hi Karega Jo Allah Ke Zyada Qareeb Hai.** (Sunan Tirmidhi Hadith No. 2694)

6. **Assalaamu Alaykum السَّلَامُ عَلَيْكُمْ Kehne Par 10 Nekiyan Milti Hai.** (Sunan Abu Dawud Hadith No. 5195)

7. **Assalaamu Alaykum Wa Rahmatullahi السَّلَامُ عَلَيْكُمْ وَرَحْمَةُ اللَّهِ Hai.** (Sunan Abu Dawud Hadith No. 5195)

8. **Assalaamu Alaykum Wa Rahmatullahi Wa Barakatuhu السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ Kehne Par 30 Nekiyan Milti Hai.** (Sunan Abu Dawud Hadith No. 5195)

9. **Sawaar (Sawari Par Baitha Hua) Chalne Wale Ko Aur Paidal Chalne Wala Baithe Hue Ko Salaam Kare.** (Sahih Bukhari Hadith No. 6233)

10. **Thode Log Zyada Logon Ko Salaam Kare.** (Sahih Al Bukhari Hadith No. 6233)

11. **Chote Bado Ko Salaam Kare.** (Sahih Bukhari Hadith No. 6231)

**12. Jab Koi Shakhs Apne Bhai Se Mile To Salaam Kare
Chahe Wo Use Jaanta Ho Ya Na Jaanta Ho.**

(Sahih Bukhari Hadith No. 28)

13. Ghar Me Dakhil Hote Waqt Salaam Kare.

(Surah An – Nur 24 : 27)

**14. Jab Kisi Ke Paas Ya Majlis Me Pahoche To Salaam
Kare Aur Jab Waha Se Wapas Laute To Bhi Salaam
Kare.**

(Sunan Abu Dawud Hadith No. 5208)

5 Ustaad Ka Adab



Ustaad (Teacher) Woh Shakhs Hai Jo Hame Khair Ki Baat Sikhata Hai Jis Me Hamare Deen wa Duniya Ki Bhalai Ho, Chahe Phir Woh Hamare School Teachers Ho, Arabi Parhane Wale Muallim, Ya Koi Bhi Shakhs Jo Kisi Bhi Qism Ka Hunar Sikhaye Sabhi Hamare Ustaad Hai.

Hum Apni Zindagi Ke Marahil Me Kisi Na Kisi Se Kuch Na Kuch Zaroor Seekhte Rehte Hai To Hame Ye Bhi Maloom Hona Chahiye Ke Hum Jin Se Kuch Seekh Rahe Hain Unke Saath Kis Tarah Ka Sulook Kare.

1. Rasoolullah ﷺ Ne Farmaya Allah

Ta'ala Aur Iske Farishte Aur Aasman Aur Zameen Ki Tamam Makhlooqat Yaha Tak Ke Bilo Me Rehne Wali Chutiyan, Samundar Me Rehne Wali Machliya Us Shakhs Ke Liye Khair Aur Barkat Ki Dua Karte Hain Jo Logon Ko Bhalai Sikhata Hai.

(Sunan Tirmidhi Hadith No. 2685)



2. Rasoolullah ﷺ Ne Farmaya Jab Insaan Mar Jata Hai To Iske Amal Ka Silsila Khatam Hojata Hai, Siwaye 3 Amal Ke Jisme Se Ek Aesa Ilm Sikhana Jis Se Log Fayeda Uthaye. (Sunan Nasai Hadith No. 3681)

3. Teacher Ka Adab Aur Ahteram Karna Chahiye Kyun Ke Woh Hamari Duniya Aur Aakhirat Me Nijaat Aur

Taraqqi Ka Sabab Bante Hai, Aur Hamari Jahalat Ko Dur Karke Hame Taleem Yafta (Educated) Banate Hai.

- 4. Teachers Ko Bure Alqaab Se Na Pukare, Aur Na Hi Unki Naqal Nikale, Aur Na Hi Peeth Piche Unki Ghibat Kare.**
- 5. Hamare Waledain Ke Baad Ustaad Hi Hote Hai Jo Hame Achchi Baate Sikhate Hai, Khair Aur Bhalai Ka ilm Dete Hai To Hame Bhi Chahiye Ke Unki Baato Ko Ghaur Se Sune Aur Un Par Amal Karne Ki Koshish Kare.**
- 6. Ilm Ka Seekhna Har Musalmaan Par Farz Hai. To Jo Shakhs Hame ilm Sikha Raha Hai Uska Martaba Bahot Bada Hota Hai.**
- 7. Tamam Uloom Me Sab Se Behtareen ilm Jo Hasil Kiya Jata Hai Who Deen-e-Islam Ka ilm Aur Uski Taleemat Hai, To Jitni Izzat Hum Apne School Teachers Ko Dete Hai, Us Se Kai Zyada Hame Deen Ka ilm Sikhane Walo Ko Deni Chahiye.**
- 8. Agar Kisi Ustaad Ki Burai Ya Kamzori Nazar Aaye To Tamam Logon Ke Saamne Uska Zikr Na Kare Balke Akele Me Narmi Se Ustaad Ko Batade.**
- 9. Ustaad Ke Ehteram Me Khada Nahi Hona Chahiye Kyun Ke Rasoolullah ﷺ Ne Is Se Mana Kiya Hai. Jo Yeh Chahe Ke Log Is Ke Samne (Ba Adab) Khade Ho To Woh Apna Thikana Jahannum Ko Bana Le.**
(Sunan Tirmidhi Hadith No. 2755)
- 10. Jab Koi Sawal Kare To ilm Hasil Karne Ki Niyyat Se Sawal Kare Na Ke Ustaad Ko Kamtar Dikhane Ke Liye**

Sawal Kiya Jaye. Kyun Ke Takabbur Allah Ko Sakht Na Pasand Hai.



6 Classroom Ke Aadaab

1. Class Room Me Dakhil Ho To Teacher Aur Classmates Ko Salaam Kare.

“Rasoolullah ﷺ Ne Salaam Ko Phailane Ka Hukm Diya Hai”.

(Sunan Tirmidhi Hadith No. 1855)

2. Jab Class Room Me Ya Kisi Majlis Me Dakhil Ho To Apne Shoes Adab Se Shoe Rack Me Ya Ek Bazu Me Rakhe Taake Kisi Doosre Ko Takleef Na Ho.

“Rasoolullah ﷺ Ne Farmaya Imaan Ki 70 Se Zyada Shaakhe Hai, Aur Uski Sab Se Adna Shaakh Raaste Se Kisi Takleef Deh Cheez Ko Hatana Hai.” (Sahih Muslim Hadith No. 153)

3. Jab Class Room Me Dakhil Ho To Aapki Fix Place Di Gai Hai To Waha Baithe Ya Jaha Jagah Mile Wahi Baith Jaye, Aur Kisi Doosre Ko Uski Jagah Se Na Uthaye.

“Rasoolullah ﷺ Ne Farmaya Ke Kisi Doosre Ko Uski Jagah Se Na Uthaye Ke Phir Uski Jagah Par Woh Khud Baithe”.

(Sahih Bukhari Hadith No. 6270)



4. Jab Class Me Ek Bench Par 2 Sathi Baithe Ho To Bina Ijazat Unke Darmiyan Na Baithe.

“Rasoolullah ﷺ Ne Farmaya Kisi Aadmi Ke Liye Halal Nahi Ke Woh Bila Ijazat 2 Logon Ke Darmiyan Tafreeq Kare”.

(Sunan Tirmidhi Hadith No. 2752)

5. Agar Koi Apni Jagah Se Uth Kar Chala Jaye Aur Phir Woh Wapas Aajaye To Kisi Doosre Ko Uski Jagah Par Nahi Baithna Chahiye.

“Rasoolullah ﷺ Ne Farmaya Tum Me Se Agar Koi Apni Jagah Se Uth Kar Chala Jaye Aur Wapas Aaye To Wahi Us Jagah Ka Zyada Haqdaar Hoga”. (Sunan Ibn Majah Hadith No. 3717)

6. Class Me Dakhil Ho To Aaraam Aur Itmenan Se Dakhil Ho, Puri Class Ko Disturb Na Kare, Aur Jahan Jagah Mile Waha Baith Jaye Aur Ladai Na Kare.

“Rasoolullah ﷺ Ne Farmaya Musalmaan Woh Hai Jiski Zuban Aur Haath Se Dusra Musalmaan Mehfooz Rahe”.

(Sahih Bukhari Hadith No. 10)

7. Jis Jagah Par Allah Ka Zikr Ho Raha Ho Waha Khamushi Ikhtiyar Karna Chahiye.

Allah Ta’ala Ne Farmaya Aur Jab Quran Parha Jaye to Uski Taraf Kaan Laga Diya Karo Aur Khamoosh Raha Karo Umeed Hai Ke Tum Par Rahmat Ho. (Surah Al-Araf 7 : 204)

8. Majlis Se Uthne Ki Dua:

سُبْحَانَكَ اللَّهُمَّ وَبِحَمْدِكَ أَشْهَدُ أَنْ لَا إِلَهَ إِلَّا أَنْتَ أَسْتَغْفِرُكَ وَأَتُوبُ
إِلَيْكَ

-Aye Allah! Tu Paak Hai Apni Khubiyon Ke Saath, Main Gawahi Deta Hun Tere Siwa Koi Saccha Mabood Nahi, Main Tujhse Gunahon Ki Maafi Mangta Hun Aur Teri Taraf Ruju Karta Hun.

(Sunan Abu Dawud Hadith No. 4859)

“Rasoolullah ﷺ Ne Farmaya Agar Kisi Shakhs Ne Majlis Me Layaani Baate Ki Aur Uthne Se Pehle Ye Dua Parhli To Uske Majlis Ke Gunah Maaf Hojate Hai”.

(Sunan Abu Dawud Hadith No. 4859)

1. Class Me Dakhil Hone Par Apne Saathi Ko Salaam Kare.

Rasoolullah ﷺ Ne Salaam Ko Phailane Ka Hukm Diya.
(Sunan Ibn Majah Hadith No. 3693)

2. Apne Doston Se Achche Lahje Aur Respectfully (Izzat Aur Ahteram Ke Saath) Baat Kare.

3. Kisi Ki Ijazat Ke Baghair Uske Samaan Ko Haath Na Lagaye.

“Rasoolullah ﷺ Ne Farmaya Musalmaan Woh Hai Jiski Zuban Aur Haath Se Dusra Musalmaan Mehfooz Rahe.”
(Sahih Bukhari Hadith No. 10)

4. Apne Dost Se Koi Cheez Jaise Pen, Pencil, Book, Copy Ya Eraser Liya Ho To Istemaal Karlene Ke Baad Wapas Laut De, Aur Uska Shukriya Ada Kare In Alfaaz Ke Zariye;

"جَزَاكَ اللَّهُ خَيْرًا"



5. Apne Classmate Se Li Hui Kisi Bhi Cheez Me Khayanat Na Kare Balke Use Usi Halat Me Wapas Kare Jis Halat Me Usse Hasil Ki Thi.

Kyun Ki Momin Amanat Me Khayanat Nahi Karta
(Sunan Tirmidhi Hadith No. 1574)

6. Aapas Me Ek Doosre Ko Bura Laqab Aur Bure Naamo Se Na Pukare. (Surah Al-Hujurat 49 : 11)

7. Kisi Bhi Insaan Se Dosti Us Ke Akhlaq, Aamaal, Aur Aqaid Ko Dekh Kar Ki Jaye Na Ke Maal o Daulat Aur Shohrat Ki Lalach Me Usse Dosti Ki Jaye.

“Rasoolullah ﷺ Ne Farmaya Aadmi Apne Dost Ke Deen Par Hota Hai, Use Ghaur Karna Chahiye Ke Woh Kis Ko Dost Bana Raha Hai.”

(Sunan Tirmidhi Hadith No. 2738)

8. Apne Dost Ko Dhoka Na De.

“Rasoolullah ﷺ Ne Farmaya Jo Dhoka De Woh Hum Me Se Nahi.”

(Sunan Abu Dawud Hadith No. 3452)

9. Aapas Me Ek Doosre Ke Talluq Se Jhoot Baat Na Kare.

“Rasoolullah ﷺ Ne Farmaya Jo Bahot Zyada Jhoot Bolta Hai Uska Naam Jhooto Me Likh Diya Jata Hai.”

(Sahih Muslim Hadith No. 6637)

10. Kisi Ka Saman Na Churaye, Kyun Ke Jab Koi Choti Cheeze Chori Karta Hai Aur Pakda Nahi Jata Hai To Ek Din Woh Bada Chor Ban Jata Hai Aur Deen e Islam Chori Karne Ko Haram Kahta Hai.

(Sunan Abu Dawud Hadith No. 3452)



11. Aapas Me Ghussa Aur Ladayi Na Kare, Aur Na Hi Ladayi Par Doosro Ko Ubhare.

“Rasoolullah ﷺ Ne Farmaya Taqatwar Woh Nahi Jo Kushti Me Pachadh De Balke Taqatwar Shakhs Woh Hai Jo Ghusse Ko Qaboo Me Rakhe.”

(Sahih Bukhari Hadith No. 6114)

12. Ek Doosre Ko Neecha Dikhane Ki Koshish Na Kare.

“Har Musalmaan Par Doosre Musalmaan Ka Khoon Maal Aur Izzat Haram Hai.” (Sahih Muslim Hadith No. 6541)

13. Apne Classmates Ya Schoolmates Ko Darana Dhamkana Nahi Chahiye.

“Kisi Musalmaan Ke Liye Durust Nahi Ke Woh Doosre Musalmaan Ko Khaufzada Kare.”

(Sunan Abu Dawud Hadith No. 5004)

14. Aapas Me Maar Peet Na Kare.

“Muslim Woh Hai Jiski Zuban Aur Haath Se Doosre Musalmaan Mahfooz Rahe.”

(Sunan Tirmidhi Hadith No. 2627)

15. Ek Doosre Se 3 Din Se Zyada Baat Cheet Band Na Kare.

“Kisi Musalmaan Ke Liye Jaiz Nahi Ke Apne Bhai Se 3 Din Se Zyada Salaam Kalaam Band Rakhe, Jab Dono Ka Aamna Saamna Ho To Woh Is Se Munh Pher Le Aur Yeh Is Se Munh Pher Le, Aur Un Dono Me Behtar Woh Hai Jo Pehle Salaam Kare.”

(Sunan Tirmidhi Hadith No. 1932)

16. Aapas Me Ek Doosre Se Hasad Na Kare.

(Sahih Bukhari Hadith No. 6064)

17. Ek Doosre Ke Liye Dil Me Bura Gumaan, Bughz Na Rakhe Aur Na Hi Ek Doosre Ki Jasoosi Kare.

(Surah Al - Hujurat 49 : 12)

- 18. Class Me Maujud Badi Umar Ke Bachcho Se Izzat o Ahteram Se Pesh Aaye Aur Choti Umar Ke Bachcho Se Shafqat Aur Narm Dili Ka Mamla Kare .**
“Woh Hum Me Se Nahi Jo Bado Ki Izzat Nahi Karta Aur Choto Par Rahem Nahi Karta.” (Sunan Tirmidhi Hadith No. 1919)
- 19. Agar Apne Saathi Ki Burai Maloom Hojaye To Uspar Parda Daale Aur Har Kisi Ke Saamne Uska Zikar Na Kare.**
“Jo Banda Duniya Me Kisi Doosre Bande Ki Pardah Poshki Karta Hai, Allah Ta’ala Qayamat Ke Din Uske Aib Dhaank Dega.”
(Sahih Muslim Hadith No. 6594)
- 20. Jab 2 Dost Aapas Me Baat Cheet Kar Rahe Ho To Unki Baate Chupke Chupke Sunne Ki Koshish Na Kare.**
“Jo Shakhs Doosro Ki Baate Sunne Ki Koshish Kare Jise Woh Napasand Samajhta Ho, To Qayamat Ke Din Uske Kaano Me Sisa Pighla Kar Daala Jayega.” (Sahih Bukhari Hadith No. 7042)
- 21. Jab Sab Log Group Me Saath Baithe Ho To Aapas Me Sargoshi Karna Ya Kaan Me Baat Karna, Bure Akhlaq Ki Alamat Hai.**
- 22. Apne Dost Ki Galti Ya Beizzati Par Na Hase.**
- 23. Parhai Me Kamzor Sathi Ki Help Kare.**



- ❖ Rasoolullah ﷺ Ne Farmaya: Ek Momin Dusre Momin Ka Bhai Hai.

(Sunan Abu Dawud Hadith No. 4918)

- ❖ Rasoolullah ﷺ Ne Farmaya: Jo Cheez Apne Liye Pasand Kare Wahi Cheez Apne Musalmaan Bhai Keliye Bhi Pasand Kare.

(Sahih Muslim Hadith No. 170)

- ❖ Rasoolullah ﷺ Ka Farman Hai, “Musalmaan Ke Musalmaan Par Kuch Huqooq Hai,

1. Salaam Ka Jawab De.

(Sahih Bukhari Hadith No. 1240)



2. Beemar Ki Beemar Pursi

Kare. (Sahih Bukhari Hadith No. 1240)



3. Janaze Ke Saath Jaye.

(Sahih Bukhari Hadith No. 1240)



4. Dawat Qubool Kare.

(Sahih Bukhari Hadith No. 1240)

5. Cheenk Ka Jawab De.

(Sahih Bukhari Hadith No. 1240)

6. Qasam Ko Pura Kar Na. (Sahih Bukhari Hadith No. 5175)

7. Mazloom Ki Madad Karna. (Sahih Bukhari Hadith No. 5175)



Jis Tarha Allah Ta'ala Ne Apni Tauheed, Ibadat Ka Zikr Kiya Hai, Usi Tarah Waledain Ke Sath Husn e Sulook Ka Bhi Zikr Quran Me Aaya Hai.

وَقَضَىٰ رَبُّكَ أَلَّا تَعْبُدُوا إِلَّا إِيَّاهُ وَبِالْوَالِدَيْنِ إِحْسَنًا ۚ إِنَّمَا يَبْغُنَّ عِنْدَكَ الْكِبَرُ
أَحَدُهُمَا أَوْ كِلَاهُمَا فَلَا تَقُلْ لَهُمَا أَفٍّ وَلَا تَهَرَّهُمَا وَقُلْ لَهُمَا قَوْلًا كَرِيمًا

Is Aayat Ke Mutabiq Allah Ta'ala Ne Hame Waledain Ke Sath Achcha Sulook Karne Ki Wasiyat Ki Hai Aur Allah Ka Aur Waledain Ka Shukr Ada Karte Rehna Hai.

(Surah Al Isra 17 : 23)

1. Waledain Ki Farmabardari Zaroori Hai Kyu Ke Maa Ke Qadmo Tale Jannat Hai Aur Baap Us Jannat Ka Darwaza Hai.

(Sunan Nasai Hadith No. 3106, Sunan Ibn Majah Hadith No. 3663)



2. Raoolullah ﷺ Ke Paas Ek Sahabi رضی اللہ عنہ Aaye, Pucha Mere Husn e Sulook Ka Sabse Zyada Haqdar Kaun Hai. Rasoolullah ﷺ Ne Farmaya; “Teri Waleda (Maa)” Is

Tarah Teen Dafa Kaha Aur Chauthi Dafa Kaha Tere Waled (Baap).

(Sahih Muslim Hadith No. 6500)

3. Waledain Ke Saath Husn e Sulook Kare, Unko Uff Tak Na Kahe, Unko Na Jhidke Aur Narmi Ke Saath Unse Baat Kare Aur Mohabbat Se Unke Liye Jhuk Jaaye. (Surah Al-Isra 17 : 23-24)

4. Beshak Allah Ne Tum Par Maaon Ki Na Farmani Ko Haraam Qarar Diya Hai.

(Sahih Bukhari Hadith No. 5975)

Agar Waledain Shirk Bidat Ya Gunah Ke Kaamo Ko Karne Ka Hukm De To Unke Hukm Ko Nahi Mana Jaayega.

“Aur Agar Woh Dono Tujh Par Is Baat Ka Dabao Daale Ke Tu Mere Sath Shareek Kare Jiska Tujhe Kuch Bhi ilm Nahi Hai, To Unka Kehna Na Maan Aur Duniya Me Achche Andaz Se Unka Sath Nibha”.

(Surah Luqman 31:15)

5. Waledain Ki Nafarmani Bahot Bada Gunah Hai:

Rasoolullah ﷺ Ne Farmaya:

“Kya Main Tumhe Sab Se Bada Gunah Na Bataun?”

Logon Ne Arz Kiya “Kyun Nahi Ya Raooolullah ﷺ”.

Rasoolullah ﷺ Ne Farmaya; “Kisi Ko Allah Ka Shareek Banana Aur Waledain Ki Nafarmani Karna”.

(Sahih Bukhari Hadith No. 5977)

6. Rasoolullah ﷺ Ki Hadith Ka Mafhoom Hai Ke Jab Rasoolullah ﷺ Se Poocha Gaya, “Allah Ko Kaunsa Amal Mehboob Hai”. Farmaya, “Waledain Ki Farmabardari.”

(Sunan Nasai Hadith No. 611)

7. Waledain Inteqal Kar Jaaye To:

- Inke Haq Me Rahm Wa Karam Aur Bakhshish Ki Dua Karna.
- Inke Wadon Ko Pura Karna.
- Inke Doston Ki Izzat Karna.

❖ Waledain Ke Liye Dua:

رَبِّ اَرْحَمُهُمَا كَمَا رَبَّيَّانِي صَغِيرًا

“Aye Mere Parwardigaar! Un Par Waisa Hi Reham
Kar Jaisa Unho Ne Mere
Bachpan Me Meri Parwarish Ki Hai”.

(Surah Al-Isra 17 : 24)

❖ Guzishta Tamam Nukaat Se Waledain Ke Jo Aadaab Samajh Aate Hain Woh Ye Hai:

- ✓ Waledain Ki Har Baat Me Farmabardari Kare Lekin Shirk, Bidat Aur Gunah Ke Kaamo Me Farmabardari Nahi Hogi.
- ✓ Unki Izzat Kare, Baat Aur Kaamo Me Adab Se Pesh Aaye.
- ✓ Unko Na Daante.
- ✓ Unse Unchi Aawaz Me Baat Na Kare.
- ✓ Unke Aage Na Chale.
- ✓ Unko Khana Khilaye.

- ✓ Jab Bimar Ho To Khayal Rakhe.
- ✓ Un Par Kharch Kare.
- ✓ Jo Rishte Maa Baap Ki Wajah Se Bane Hai Unse Talluqat Rakhe.
- ✓ Unke Liye Dua Astaghfar Kare.
- ✓ Unke Wade Pure Kare.
- ✓ Unke Doston Ke Sath Ehtram Se Pesh Aaye.



❖ Apne Ghar Me Dakhil Hone Ke Aadaab:

1. Jab Hum Apne Ghar, Daftar Ya Masjid Me Dakhil Ho To Hume Hamesha Pehle Right Leg Aage Badhana Chahiye Kyu Ke Ye Sunnat e Rasool ﷺ Hai. (Sahih Bukhari Hadith No. 426)
2. Jab Hum Apne Ghar, Daftar Ya Masjid Me Se Bahar Nikle To Ulta Pair (Left Leg) Pahle Nikale.
(Sunan Ibn Majah Hadith No. 3616)
3. Jab Hum Apne Ghar Me Dakhil Ho To Kahe :

بِسْمِ اللَّهِ

Bismillaah

(Sunan Ibn Majah Hadith No. 3887)

4. Kisi Munasib Darwaze Se Hi Ghar Me Dakhil Ho. Ghar Me Dakhil Hone Ke Baad Salaam Kare.
5. Agar Aap Aise Kisi Waqt Ghar Me Dakhil Ho Rahe Ho Ke Log Aaraam Kar Rahe Ho To Shor Karte Hue Dakhil Na Ho.
(Sunan Tirmidhi Hadith No. 2719)
6. Kisi Ke Kamre Me Dakhil Hone Se Pahle Ijizat Le.

❖ Kisi Ke Ghar Jaane Ke Aadaab

1. Jab Aap Kisi Ke Ghar Jaye To Munasib Andaz Me Dastak De Ya Ghanti Bajaye. Ghanti Itni Na Bajayi Jaye

Ke Shor Ho Jaye, Aur Na Hi Ghusse Ke Andaaz Me Dastak De.

2. Allah Ta'ala Quran Me Farmate Hai
 “Aye Imaan Walo! Apne Gharo Ke ilawa Doosre Gharo Me Dakhil Na Ho Jab Tak Ke Ijazat Na Le Lo Aur Unme Rehne Walo Ko Salaam Na Karo. Yeh Tumahre Haq Me Behtar Hai Take Tum Nasihat Yaad Rakho.” (Surah An-Noor 24 : 27)
3. Do Dastako, Ya Do Ghantiya Bajane Ke Darmiyaan Thoda Waqfa Ikhtiyar Kare, Is Liye Ke Agar Ghar Wale Washroom Me Ho , Kha Rahe Ho, Yaa Aaram Kar Rahe Ho To Unhe Daud Kar Aane Ki Zehmat Na Ho, Woh Apna Kaam Mukammal Kar Ke Khud Darwaza Khol Denge.
4. Sirf Teen Martaba, Dastak Ya Bell Bajaye, Aur Agar Koi Phir Bhi Jawab Na De To Waha Se Laut Jaye.
 Rasoolullah ﷺ Ne Farmaya : “Jab Tum Me Se Koi Teen Baar Dakhil Hone Ki Ijazat Mange Lekin Use Ijazat Na Di Jaye To Woh Wapas Chala Jaye. (Sahih Bukhari Hadith No. 6245)
5. Allah Ta'ala Quran Me Yun Farmate Hai Ke:
 “Aur Agar Tum Se Wapas Jane Ko Kaha Jaye To Wapas Chale Jao, Kyu Ke Yeh Tumahre Liye Zyada Pakeezah Hai” (Surah An-Noor 24 : 28) .
6. Jab Bhi Dastak Dedo To Darwaze Ke Bilkul Samne Hi Na Khade Raha Karo, Ya To Right Side Ho Jaye Ya Left Side Ho Jaye Take Be Pardagi Se Bach Jaaye.
7. Kisi Aur Ke Ghar Me Naa Jhaake.
 Rasoolullah ﷺ Ne Farmaya, “Agar Koi Shakhs Tumhari

Ijazat Ke Baghair Tumhe Jhaank Kar Dekhe Jab Ke Tum
Ghar Me Ho To Tum Ise Kankari Maardo Jis Se Iski
Aankh Phut Jaye To Tum Par Koi Gunah Nahi Hai” (Sahih
Bukhari Hadith No. 6902)

❖ Ghar Se Bahar Jaane Ki Dua:

بِسْمِ اللَّهِ تَوَكَّلْتُ عَلَى اللَّهِ لَا حَوْلَ وَلَا قُوَّةَ إِلَّا بِاللَّهِ

Allah Ke Naam Se, Maine Allah Par Bharosa Kiya
Allah Ke Siwa Koi Taqat Nahi Hai.
(Sunan Tirmidhi Hadith No. 3426)





1. Toilet Me Dakhil Hone Se Pehle Bismillah Parhe.

(Sunan Ibn Majah Hadith No. 297)

2. Toilet Me Dakhil Hone Ki Dua:

اللَّهُمَّ إِنِّي أَعُوذُ بِكَ مِنَ الْخُبْثِ وَالْخُبَائِثِ

-Aye Allah! Main Panah Mangta Hu Muzakkar
Aur Monnas Shayateen Se. (Sunan Tirmidhi Hadith No. 6)

**3. Toilet Me Dakhil Hote Waqt Ulta Pair – Left Leg
Pehle Rakhna.**

4. Toilet Me Baat Nahi Karna. (Silsila Ahadees Sahiha Hadith No. 435)

5. Peshaab Ke Chinton Se Bachna. (Sahih Bukhari Hadith No. 216)

**6. Peshaab Baith Kar Karna Chahiye Majburi Ki Surat
Me Khade Hoka Kar Sakte Hai.**

Baith Kar Kare Ya Majboori Ya Bimari Me Khade Ho
Kar Kare Magar Har Haal Me Chinton Se Bache. (Sahih
Bukhari Hadith No 224)

**7. Ulte Hath – Left Hand Se Apne Peshab Aur Pakhane
Ki Jagah Ko Dhona.** (Sunan Abu Dawud Hadith No. 8)

**8. Toilet Se Bahar Nikalte Waqt Seedha Pair – Right
Leg Rakhna .**

9. Toilet Se Nikalne Ki Dua.

عُفِّرْ اَنَّاكَ

-Aye Allah! Main Teri Bakhshish Chahta Hu.

(Sunan Ibn Majah Hadith No. 300)

10. Rasoolullah ﷺ Ne Thehre Huye Pani Me Peshab Karne Se Mana Kiya.

(Sahih Muslim Hadith No. 656)

11. Rasoolullah ﷺ Ne Kisi Saaye Daar Darakht Ke Niche Peshab Paakhana Karne Se Mana Farmaya.

(Sunan Ibn Majah Hadith No. 328)



1. Wudhu Kare. (Sunan Abu Dawud Hadith No. 5046)
2. Isha Ki Namaz Ke Baad Sone Me Jaldi Karna.
(Sahih Bukhari Hadith No. 568)
3. Sone Se Pehle Apna Bistar Jhaadle.
(Sunan Abu Dawud Hadith No. 5050)
4. Humesha Seedhe Janib – Right Side Lete.
Rasoolullah ﷺ Jab Sone Ka Irada Karte To Apna
Seedha Haath Seedhe Gaal Ke Niche Rakhte.
(Sunan Abu Dawud Hadith No. 5045)
5. Right Side Se Start Le Baad Me Aap Chaahe To Left
Side Ya Chit – Straight Bhi So Sakte Hai.
6. Pet Ke Bal Na Lete Rasoolullah ﷺ Ne Isse Mana Kiya
Hai Kyun Ke Jahannumi Is Tarah Pade Honge.
(Sunan Ibn Majah Hadith No. 3724)

❖ Sone Se Pehle Ke Azkaar:

1. Sone se Pahle ye Dua Parhe:

اللَّهُمَّ بِاسْمِكَ أَمُوتُ وَأَحْيَا

“Aye Allah Tere Hi Naam Se Marta Hu Tere Hi
Naam Se Zinda Hota Hu”

(Sahih Bukhari Hadith No. 6325)

2. Sone Se Pehle Ayat Al Kursi Parhe.
(Sahih Bukhari Hadith No. 2311)
3. Sone Se Pehle Charo Qul Parhe.
(Sahih Bukhari Hadith No. 5017), (Sunan Abu Dawud Hadith No. 5055)
4. Surah Mulk Ki Tilawat Kare. (Sunan Tirmidhi Hadith No. 2892)

5. Sone Se Pehle Surah Al Baqarah Ki Aakhri 2 Aayatun Ki Tilawat Kare. (Sahih Bukhari Hadith No. 5009)

6. Sone Se Pehle Tasbeeh-e-Fatima Parhe:

سُبْحَانَ اللَّهِ	الْحَمْدُ لِلَّهِ	اللَّهُ أَكْبَرُ
Subhaan Allah	Alhumdu Lillah	Allaahu Akbar
33 Martaba	33 Martaba	34 Martaba

(Sunan Abu Dawud Hadith No. 5065)

7. Bara Bin Azib رضي الله عنه Se Riwayat Hai Ke, Rasoolullah صلی اللہ علیہ وسلم Ne Farmaya:

“Aye Falan-Falan Jab Tum Apne Bistar Par Jao (Sone Ke Liye) To Kaho”.

اللَّهُمَّ إِنِّي أَسْلَمْتُ وَجْهِي إِلَيْكَ وَفَوَّضْتُ أَمْرِي إِلَيْكَ وَأَلْجَأْتُ ظَهْرِي
إِلَيْكَ

رَغْبَةً وَرَهْبَةً إِلَيْكَ لَا مَلْجَأَ وَلَا مَنَاجَا مِنْكَ إِلَّا إِلَيْكَ آمَنْتُ بِكِتَابِكَ
الَّذِي أُنْزِلَتْ وَبَنِيِّكَ الَّذِي أُرْسِلَتْ

- “Aye Allah Main Apne Aap Ko Tere Supurd Karta Hu, Apne Muamlaat Ko Tere Supurd Karta Hu, Apna Rukh Teri Taraf Karta Hu, Aur Tujh Par Hi Tawakkul Karta Hu, Tujh Se Ummeed Rakhta Hu, Aur Tujh Se Darta Hu, Tere Siwa Na Koi Jaye Panah Hai Aur Na Koi Farar Hai, Main Teri Kitaab Quraan Par Imaan Lata Hu, Jo Tune Nazil Ki Hai Aur Us Nabi Par Jise Tune Bheja Hai.”

Agar Tum Is Raat Mar Gaye To Tum Musalmaan Ho Kar Maroge Aur Agar Tum Subah Ko Zinda Hoge To Tumhe Ajr Milega.

(Sahih Muslim Hadith No. 6882)

8. Aadhi Raat Ko Jab Aap Bedaar Ho To Dua Kare.

لَا إِلَهَ إِلَّا اللَّهُ وَحْدَهُ لَا شَرِيكَ لَهُ , لَهُ الْمُلْكُ , وَلَهُ الْحَمْدُ
وَهُوَ عَلَى كُلِّ شَيْءٍ قَدِيرٌ , سُبْحَانَ اللَّهِ , وَالْحَمْدُ لِلَّهِ
وَلَا إِلَهَ إِلَّا اللَّهُ , وَاللَّهُ أَكْبَرُ , وَلَا حَوْلَ وَلَا قُوَّةَ إِلَّا

بِاللَّهِ الْعَلِيِّ الْعَظِيمِ

(Sunan Ibn Majah Hadith No. 3878)

9. Jab Koi Bura Khwaab Dekhe To 3 Baar Ulte Taraf –
Left Side Khushk Thooke, 3 Baar Shaitaan Mardood
Se Allah Ki Panah Mange Aur Dusri Taraf Palat Kar
So Jaye. (Musnad Ahmed Hadith No. 14780)



1. Subah Jaldi Uthna.

2. Subah Ke Kaamo Me Barkat Hoti Hai.

Rasoolullah ﷺ Ne Farmaya Aye Allah Meri Ummat Ke Liye Subah Ke Waqt Barkat Ata Farma. (Sunan Ibn Majah Hadith No. 2238)

3. Shaitan Ki Girah Tod De.

Allah Ke Rasool ﷺ Ne Farmaya Aap Ki Neend Ke Dauran Shaitan Aap Me Se Har Ek Ke Sar Ke Pichle Hisse Par 3 (Teen) Girhen Lagata Hai Aur Har Girah Par Ye Alfaz Pukarta Hai “Raat Lambi Hai Sote Raho.” Phir Jab Momin Neend Se Jagta Hai To Ek Girah Khul Jati Hai Aur Jab Wo Wudhu Karta Hai To Doosri Girah Khul Jati Hai Phir Jab Wo Fajr Keliye Khada Hota Hai To Teesri Girah Khul Jati Hai. Aur Phir Wo Khush Mizaj Din Guzarta Hai Warna Pura Din Suste Me Guzarta Hai
(Sahih Bukhari Hadith No. 3269)

4. Neend Se Bedaar Hone Par Dono Haath Apne Chehre Par Phere. (Sunan Ibn Majah Hadith No. 1363)

5. Subah Uthne Par Ye Dua Parhe.

الْحَمْدُ لِلَّهِ الَّذِي أَحْيَانَا بَعْدَ مَا أَمَاتَنَا وَإِلَيْهِ
النُّشُورُ

-Tamaam Ta'reefein Us Allah Ke Liye



Hain Jis Ne Hame Zindah Kiya Is Ke Baad Ke Hame Maut
(Muraad Neend Hai) De Di Thi Aur Usi Ki Hi Taraf Jaana
Hai.

(Sahih Bukhari Hadith No. 6314)

6. Apni Naak Jhade Aur Do Se Teen Martaba Haath Dhoye.

1. Apni Naak Jhade Kyu Ke Shaitan Naak Ke Banse Me
Raat Guzarta Hai. (Sahih Bukhari Hadith No. 3295)
2. Aur Hum Nahi Jaante Hamara Haath Neend Me Kaha
Kaha Gaya Is Liye Haath Dhoye.

(Sunan Tirmidhi Hadith No. 24)



7. Miswak Kare Ya Brush Se Daanto Ki Safai Kare.

8. Wudhu Kare Aur Fajr Ki Do Rakat
Sunnat Parhe Aur Fajr Ki Farz Namaz Parhe.
Kyun Ki Fajr Ki Do Rakat Sunnat Duniya Ki Tamam
Cheezo Se Behtar Hai. (Sahih Muslim Hadith No.1688)

9. Subah Ke Azkar Parhe.

❖ **Allah Ta'ala Farmata Hai**

“Is Qudrat Ki Nishaniyo Me Se Tumhara Raat Aur Din Ko Sona Bhi Hai.” (Surah Rum 30 : 23)

Insaan Sota Hai To Iske Shaoor Aur Hawaas Khatam Hojate Hai Aur Woh Murde Ki Tarha Ho Jata Hai, Phir Jab Bedar Hota Hai To Iske Shaoor Aur Hawaas Bahaal Hojate Hai Jaise Dobara Zinadgi Mil Jaati Hai.

❖ **Khwaab:**

Jab Hum Sote Hai To Hum Khwaab Dekhte Hai.

❖ **Mubashshiraat:**

مبشرات: Yani Aise Khwaab Jinko Dekh Kar Khushi Mehsoos Hoti Hai.

❖ **Munziraat:**

منذرات: Yani Jab Khawaab Dekhe To Aise Khwaab Ko Dekh Kar Hume Dar Lagta Hai.

1. Rasoolullah ﷺ Ne Farmaya, Jab Tum Me Se Koi Shakhs Pasandeeda Khwaab Dekhe To Woh Allah Ki Taraf Se Hai, Woh Us Par Allah Ki Hamd Kare Aur Use Bayan Kare, Aur Jab Iske Bar Aks Na Pasandeeda, Darawna Khwaab Dekhe To Woh Shaitaan Ki Taraf Se Hai, Pas Woh Iske Shar Se Panah Mange Aur Kisi Ke Samne Bayan Na Kare Kyun Ke Woh Ise Nuqsaan Dega. (Sahih Bukhari Hadith No. 6985)
2. Achche Khwaab Ko Sirf Unhi Logo Ke Samne Bayan Kare Jo Aapse Mohabbat Rakhte Hai.
(Sahih Muslim Hadith No. 5903)
3. Rasoolullah ﷺ Ne Farmaya, Nek Khwaab Aur Ek Riwayat Me Hai Achcha Khwaab Allah Ki Taraf Se Hai Aur Bura Khwaab Shaitaan Ki Taraf Se, Par Jo Shakhs Bhi Na Pasandeeda Cheez Khwaab Me Dekhe To Apne Left Side 3 Martaba Thoonk De Aur Allah Se Panah Mange, Pas Ye Khwaab Ise Nuqsaan Nahi Pohonchayega.
(Sahih Bukhari Hadith No. 6986)
4. **Jhoota Khwaab**
 - Rasoolullah ﷺ Ne Jhoota Khwaab Bayan Karne Se Mana Farmaya.
(Sahih Bukhari Hadith No. 7042)
 - Jo Shakhs Bhi Jhoota Khwaab Bayan Karega Use Ye Azab Diya Jayega Ke Jaw Ke Do Daano Ke Darmiyan Girah Lagaye Aur Wo Aesa Hargiz Na Kar Sakega. (Sunan Ibn Majah Hadith No. 3916)

❖ In Hadeeso Se Jo Baat Pata Chali.

❖ Achhe Khwaab:

1. Achcha Khwaab Allah Ki Taraf Se Hai.
2. Apne Kisi Qareebi Ko Batana Chahiye Har Kisi Ko Na Bataye.

❖ Bure Khwaab:

1. Shaitaan Ki Taraf Se Hote Hai.
2. Jab Bhi Bura Khawab Dekhe To Apne Ulte Janib (Left Hand Side) Teen Martaba Thoonk De .
3. Shaitaan Se Panah Mangna Hai Aur Jis Karwat Lete Ho Use Badal Lena Hai.
4. Bure Khwaab Kisi Se Bayan Nahi Karna Hai.
5. Jab Ham Ye Tamam Aamaal Kareng To Bura Khwaab Koi Nuqsan Nahi Dega.

❖ Bure Khwaab Se Kaise Bacha Jaye:

Sone Se Pehle

1. Ba Wudhu Soye.
(Sunan Abu Dawud Hadith No. 5042)
2. Sone Se Pehle Ayatul Kursi Aur Deegar Azkaar Parh Kar Soye.
(Sahih Bukhari Hadith No. 5010)



1. **Hath Dhona.**

2. **Rasool ﷺ Ne Farmaya Jab Tum Me Se Koi Khaye To Allah Ka Naam Le. Yaani Bismillah Kahe.**

بِسْمِ اللَّهِ

“Bismillaah”

(Sunan Abu Dawud Hadith No. 3767)



3. **Agar Bismillah Kahna Bhool Jaye To Ye Parhe**

بِسْمِ اللَّهِ أَوَّلَهُ وَآخِرَهُ

“Bismillaahi Awwalahu Wa Aakhirah”

(Sunan Abu Dawud Hadith No. 3767)

4. **Seedhe Hath (Right Hand) Se Khaye. Kyu Ke Ulte Haath (Left Hand) Se Shaitan Khata Hai.**

(Sahih Bukhari Hadith No. 5376)

5. **Apne Saamne Se Khao.**

(Sahih Bukhari Hadith No. 5376)

6. **Tek Lagakar Na Khayen.**

(Sunan Abu Dawud Hadith No. 3769)

7. **Khana Bila Wajah Dustbin Me Na Pheken, Khud Pura Khaye Ya Agar Bach Jaye To Doosro Ko Khilade.**

8. **Khane Me Aib (Burai) Na Nikale**

Abu Huraira رضى الله عنه Se Riwayat Hai Ke Rasool ﷺ Ne Khane Me Kabhi Aib Na Nikala Agar Unhe Pasand Na Aata To

Use Chor Dete .
(Sahih Bukhari Hadith No. 3563)

9. Khane Ke Baad Dua Parhe

Rasool ﷺ Ne Farmaya “Jis Ne Khana Khaya Phir Kaha Al-hamdulillah Tamam Tarife Allah Ke Liye Hai Us Ke Pichle Gunah Maaf Ho Jayenge.

أَلْحَمْدُ لِلَّهِ الَّذِي أَطْعَمَنِي هَذَا وَرَزَقَنِيهِ مِنْ غَيْرِ حَوْلٍ مِنِّي وَلَا قُوَّةٍ

Tamam Tareefein Hain Is Allah Ke Liye Jis Ne Hame Yeh Khana Khilaya Aur Use Hame Ataa Kiya, Meri Taraf Se Mehnat Mashaqqat Aur Quwwat-o-Taaqat Ke Istemaal Ke Baghair,
(Sunan Tirmidhi Hadith No. 3458)

10. Sone Ya Chandi Ke Bartano Me Khana Nahi Khana Chahiye.

(Sahih Bukhari Hadith No. 5426)

11. Khane Ke Baad Kulli Kare. (Sahih Bukhari Hadith No. 5454)

12. Jitni Zaroorat Ho Utna Khana Le.

13. Khana Plate Me Na Chode. (Sunan Abu Dawud Hadith No. 3845)

14. Khane Ke Baad Allah Ka Shukr Ada Kare.

(Sunan Ibn Majah Hadith No. 1765)

15. Khane Ka Kuch Hissa Agar Gir Jaay To Use Saaf Karke Khana Bahtar Hai.

Anas Ibn Maalik رضى الله عنه Ne Bayan Kiya Rasoolullah ﷺ Ne Farmaya Ke Agar Tum Se Koi Khane Ka Tukda Gir Jaye To Use Chahiye Ke Usme Se Gandagi Nikal De Aur Kha Le Aur Use Shaitan Ke Liye Na Chore Tum

Nahi Jante Ke Tumhare Khane Me Barkat Kahan Hai
(Sahih Muslim Hadith No. 5306)

❖ Paani Aur Doodh Peene Ki Sunnate:

- Paani Baith Kar Peena Chahiye.
- Paani Teen Saans Me Peena Chahiye. (Sahih Muslim Hadith No. 5287)
- Doodh Peene Se Pehle Dua Parhe.

اَللّٰهُمَّ بَارِكْ لَنَا فِيْهِ وَزِدْنَا مِنْهُ

Aye Allah! Hamare Liye Is Me Barkat Ataa Farma
Aur Hame Zyada Ataa Farma
(Sunan Abu Dawud Hadith No. 3730)

- Rasoolullah ﷺ Doodh Peene Ke Baad Kulli Kar Lete.
(Sahih Bukhari Hadith No. 211)

❖ Halal Aur Haraam Khane:

Halal Khana:

Khane Aur Peene Ki Cheeze Mukhtalif
Qism Ki Hai, Allah Ta'ala Hume Jin Khano
Ko Khane Ki Ijazat Deta Hai Unhe Halal
Khana Kehte Hai.



Example : Phal, Sabzi, Ande, Halal Janwar Ka Gosht, Fish,
Chawal, Doodh Etc Ye Sab Halal Khane Ki Kuch Misale
Hai.

Haram Khana:

Khane Aur Peene Ki Cheeze Jinko Khane Ki Ijazat Allah Ta'ala Hume Nahi Deta Hai, Aisi Cheezo Ko Haram Kehte Hai.

Example:

1. Khinzeer (Pig), Murda Jaanwar, Ghairullah Ke Naam Par Zubah Kiye Jaane Wali Cheeze. (Surah Al-Mā'idah 5: 3)

2. Sharaab, Nashawar Cheeze Jaise Ke Drugs Khana Peena Haram Hai.

(Sunan Abu Dawud Hadith No. 3680)

3. Woh Cheeze Jisme Haram Jaanwar Ka Gosht Ho Woh Bhi Haram Hai.



Chapter

16

Cheenk Aur Jamai Ke Aadaab



1. Anas Bin Malik رضي الله عنه, Rasoolullah ﷺ Ka Ye Farmaan Naqal Karte Hai “Jab Allah Ta’ala Ne Adam عليه السلام Me Rooh Phunki Aur Woh Unke Sar Tak Pahonchi, To Unko Cheenk Aagayi, To Unhone Ye Kaha

الْحَمْدُ لِلَّهِ رَبِّ الْعَالَمِينَ

“Tamaam Tareefen Allah Ke Liye Hai Jo
Tamaam Jahanon Ka Rab Hai”

Yaani Har Tarah Ki Hamd Allah Ta’ala Ke Liye
Makhsoos Hai Jo Tamam Jahano Ka Parwardigaar Hai,
To Allah Ta’ala Ne Unse Farmaya:

يَرْحَمُكَ اللَّهُ

Allah Tum Par Rahem Kare.

(Sahih Ibn Hibban Hadith No. 6165)

2. Abu Huraira رضي الله عنه Se Riwayat Hai Ke Rasoolullah ﷺ Ne Farmaya:
“Allah Ta’ala Cheenk Ko Pasand Karta Hai Lekin Jamai Ko Napasand Karta Hai, Lehaza Agar Tum Me Se Kisi Ko Cheenk Aaye To Woh الْحَمْدُ لِلَّهِ Kahe”

(Sahih Bukhari Hadith No. 6223)

3. “Jamai Ye Shaitan Ki Taraf Se Hai Lehaza Agar Tum Me Se Kisi Ko Jamai Aati Hai To Use Rokne Ki Puri Koshish Karni Chahiye, Kyuke Jab Tum Me Se Koi

Jamai Leta Hai To Shaitan Uspar Hasta Hai”.

(Sahih Bukhari Hadith No. 6226)

4. Jamai Ke Baad Koi Masnoon Dua Sabit Nahi Hai

❖ Cheenk Aur Uska Jawab Kin Alfaaz Me De:

Abu Huraira رضي الله عنه Se Riwayat Hai Ke Rasoolullah ﷺ Ne Farmaya: “Jab Tum Me Se Kisi Ko Cheenk Aaye To Woh Kahe:

الْحَمْدُ لِلَّهِ

“Tamaam Tareefe Allah Ke Liye Hai”

- Aur Uska (Muslim) Bhai Ya Saathi Ye Kahe:

يَرْحَمُكَ اللَّهُ

Allah Tum Par Rahem Farmaye

- Jab Jawab dene Wala يَرْحَمُكَ اللَّهُ Kahe To Cheekne Wala Kahe:

يَهْدِيكُمْ اللَّهُ وَيُصْلِحْ بَالَكُمْ

Allah Tum Ko Hidaayat De Aur Tumhari Halat Ko Behtar Banaye.

(Sahih Bukhari Hadith No. 6224)



الْحَمْدُ لِلّٰهِ

"All the praise and thanks to be Allah"

Umer



يَرْحَمُكَ اللهُ

"May Allah have mercey upon you"



يَهْدِيْكُمْ اللهُ وَيُصْلِحُ بِاَلَيْكُمْ

"May Allah guide you and rectify your condition"

Notes:_____

IRC ARABIC ACADEMY

READ | UNDERSTAND | PRACTICE

Facility

- Free Syllabus and Bag
- No Admission Fee
- No Donation
- No Vacation Fee
(Pay Only For 10 Months In a Year)
- Experienced Teachers
- Biometric Attendance System
- Examination Followed By Result
- Monthly Progress Report
- Certificate After Completion of
Qaida, Nazera Quran & Tajweed
- Parent Teacher Meeting
- Limited Students
- For Boys & Girls
- CCTV Cameras
- Inverter Backup



Scan For Location



ISLAMIC RESEARCH CENTRE EDUCATION & WELFARE TRUST

1-23-100, Rohila Gali, Aurangabad - 431001 Maharashtra, India.
www.irc-india.com | 80-5545-5545

Academy Address: Crescent Housing Society, Near Naval Tata Stadium,
N-12 Cidco, Rauza Bagh, Aurangabad.
www.IRCArabicAcademy.com | 80-5506-5506

